



## Headlines

- उपराज्यपाल मनोज सिन्हा होरें पिच्छले 25एं बरें थमां अमरनाथ यात्रियें दी सेवा करा रदी वाराणसी आधारित सेवा समीति दे रजत जयंति समारोह च शिरकत कीती ते नागरिकें अग्गे दया पर आधारित समाज दा निर्माण करने दी अपील कीती।
- सुरक्षाबलें कठुआ जिले दे बिलावर इलाके च जैश-मोहम्मद दे इक खतरनाक आतंकवादी गी मारी मकाया ऐ।
- 77में गणतंत्र दिवस समारोह गितै तयारियां जोरें-शोरें जारी- अज्ज होआ रदी ऐ कार्यक्रमें दी फुल ड्रेस रिहर्सल।
- जम्मू-कश्मीर दे 7 मैडिकल कालजें च 50 बाद्दू सीटें पर दाखले गितै काउंसलिंग अज्ज होआ रदी ऐ।
- जम्मू-कश्मीर दे 6 जिलें च बर्फू दे ल्हास- तोदें पौने दी चेतावनी जारी- राजौरी च अज्ज सब्भै स्कूल बंद।



## LG -Samiti

उपराज्यपाल मनोज सिन्हा होरें आम शैहरियें अग्गे अपील कीती ऐ जे ओह किट्ठे रलियै इक ऐसे समाज दा निर्माण करने च सहयोग देन- जेहड़ा दया भाव- सदभाव- इक दुए दा सहयोग ते

रमानदारी आहले माहौल च इक दुए कन्नै मिलियै रौहने जनेइयें बुनियादें पर टिके दा होए। एह गल्ल एल.जी होरें कल श्री बाबा काशी विश्वानाथ सेवा समीति दे रजत जयंति समारोह गी सम्बोधित करदे होई आखी। एह समीति इक स्वयं सेवी संगठन ऐ- जेहड़ा पिच्छले 25एं बरें थमां श्री अमरनाथ जी यात्रा दौरान श्रद्धालुएं दी सेवा करदा आवा रदा ऐ। मनोज सिन्हा होरें आखेया जे मजूदा दौर च अध्यात्मिक जागरुकता समाज च जरनीकपुने ते सदभाव आहले माहौल च किट्ठै रलियै जीने लेई जागरुकता पैदा करदी ऐ। एल.जी. होरें समीति दे कम्में दी सराहना करदे होई आखेया जे एह अध्यात्मिक अनुशासन दी पालमा करदे होई इन्नै कठन मौसमी हालात च बी निस्वार्थ भाव कन्नै एह समीति सेवा करदी ऐ।

<><><><><><>

### **Terrorist Killed (Byte)**

जिले दे बिलावर इलाके च सुरक्षाबलें इक महत्वपूर्ण कामयाबी हासल करदे होई पाकिस्तान आधारित आतंकी संगठन जैश-ए-मोहम्मद दे इक सिरे दे आतंकवादी गी मारी मकाया ऐ। इक टकोहदी सूह दी बिनाह पर कारवाई करदे होई जम्मू-कश्मीर पुलस ते फौज नै पड़ेतर इलाके च कारवाई करदे होई आतंकी गी ढेर करी दिता। इस बारे मीडिया गी जानकारी दिंदे होई एस.एस.पी. कठुआ मोहिता शर्मा होरें दस्सेया.....(बाईट)

<><><><><><>

### **R-Day –Preparations (Byte)**

जम्मू दे मौलाना आजाद स्टेडियम च 77में गणतंत्र दिवस समारोह लेई तयारियां जोर-शोर कन्नै चला रदियां न- जित्थे उपराज्यपाल मनोज सिन्हा मुख समारोह दी अध्यक्षता करगंन ते रस्मी

सलामी लैगंन। इस मौके मुखमंत्री उमर अब्दुल्ला होर बी मुख परौहने दे तौरा पर मौजूद रौहगंन। मार्च-पास च हिस्सा लै करदे बक्ख-बक्ख दस्तें ते रंगारंग कार्यक्रम इस खेतर दी सांस्कृतिक विरासत दे अनोखे मिश्रण गी प्रदर्शित करगंन। समारोह दी तयारियें गी अखीरी रूप देने लेई अज्ज इक फुल ड्रेस रिहर्सल होने दा कार्यक्रम बी ऐ।

इस दौरान समूलचें जम्मू खिते च सुरक्षा दे व्यापक बंदोबस्त कीते गेदे न तां जे उत्सव गी सुचारु ते शांतिपूर्ण तरीके कन्नै सम्पन्न कीता जाई सकै। जम्मू- कठुआ- साम्बा रेंज दे डी.आई.जी शिव कुमार शर्मा होरें इस बारे जानकारी दिंदे होई आखेया .....(बाईट)



### **Prog. Ann. Constitution**

आकाशवाणी जम्मू दा क्षेत्रीय समाचार एकांश 77में गणतंत्र दिवस मनाने दे सरबंध च अज्ज 30एं मिंटें दी अवधि आला इक खास परिचर्चा कार्यक्रम गी पेश करने जा'रदा ऐ। इस खास कार्यक्रम दा विशे होग 'Our constitution our strength' यानि स्हाड़ा संविधान स्हाड़ी ताकत। एह खास कार्यक्रम शनिवारें यानि अज्ज दपैहरी साड़े 12 बजे प्रसारित कीता जाहग। रक्षा समीक्षक दे तौर पर ब्रिगेडियर डी.एन पांडे, ते संविधान माहिर दे तौर पर विजय सहगल जेड़े लॉ विभाग जम्मू युनिवर्सिटी दे प्रोफेसर न- होर इस कार्यक्रम च परौहने होडन जेड़े विशे पर अपने बचार सांझा करडन.....(बाईट)



### **MBBS Counselling**

जम्मू-कश्मीर बोर्ड ऑफ प्रोफेशनल एंट्रेंस एग्जामिनेशन (BOPEE) एस.एम.वी.डी.आई.एम.ई. च योग्यता दे आधार पर चुने गेदे 50 एम.बी.बी.एस मेदवारें लेई अज्ज बड्डलै 10 बजे थमां काउंसलिंग आहली प्रक्रिया शुरु होआ रदी ऐ। राश्ट्रीय मैडिकल आयोग दे हुकम मताबक इनें सीटें दा सृजन कीता गया ऐ ते केन्द्र शासत प्रदेश दे 7एं सरकारी मैडिकल कालजें च इनेंगी अलॉट कीता जाग। काउंसलिंग दी प्रक्रिया अज्ज गै पूरी होई जाग ते सब्बनें 50 MBBS आस्त चुने गेदे मेदवारें गी मेरिट दे आधार पर इनें 7एं मैडिकल कालजें च दाखला दिता जाग। BOPEE नै इक तफसीली अधिसूचना जारी करियै सब्बनें मेदवारें गी इस बारे सूचि करी दिता ऐ। होर मती जानकारी आस्तै मेदवारें गी सलाह दिती जंदी ऐ जे ओह BOPEE दी अधिकारिक वैबसाईट पर जान।



### Vande Matram –Rbn (Byte)

स्थाड़े राश्ट्री गीत “वंदे मातरम” दे 150 बरे पूरे होने दे सिलसिले च आयोजत कार्यक्रमें दे दुए गेड़ तैहत रामबन जिले च जिला स्तह दे इक कार्यक्रम दा सरिस्ता कीता गया। गीत दे 150में बरे गी इस करियै मुख्य भरै च इन्नें बड्डे पैमाने पर मनाया जा रदा ऐ जे इस्सै गीत नै भारत दी अजादी दे संघर्ष गी प्रेरणा दिती ते अज्ज बी एह एकता सदभाव ते राश्ट्रीय गौरव दा प्रतीक ऐ। जिला प्रशासन दा आखना ऐ जे इस चाल्ली दे आयोजनें कन्नें देश-प्यार दी भावना मजबूत हुंदी ऐ ते लोकें गी अपनी परम्पराएं- संस्कृतियें -सनैहरी ते संघर्षपूर्ण इतिहास बारे जानकारी हासल करने दी प्रेरणा थहोंदी ऐ। इस बारे गल्ल करदे होई रामबन दे मुख्क योजना अधिकारी शकीब अहमद राथर होरें आखेया.....(बाईट)



## Avalanche Warning

मौसम विभाग दी पेशनगोई गी ध्यानै च रखदे होई प्रशासन नै जम्मू-कश्मीर दे 6एं जिलें दे उप्परले पहाड़ी इलाकें च ताजा बर्फबारी दे बाद ल्हास-पस्सियां पौने दी शेंका जतांदे होई चेतावनी जारी कीती ऐ। एह चेतावनी जम्मू प्रांतै दे डोडा- किश्तवाड़- पुंछ ते राबमन जिलें ते कश्मीर घाटी दे कुपवाड़ा ते गांदरबल जिलें लेई कीती गेदी ऐ ते लोकें गी अगले 12एं कोला 24एं घंटे तोड़ी मता सौहगा-सतर्क रौहने लेई आखेया गया ऐ। लोकें अग्गे अपील कीती गई ऐ जे ओ उनें इलाकें च जाने कोला बचन- जित्थे बर्फू दे ल्हास तोदें पौने दी मती शेंका बनी दी रौहन्दी ऐ। चेतावनी गी ध्यानै च रखदे होई राजौरी दे जिला विकास कमीशनर होरें जिले च सारे स्कूल अज्ज बंद रखने दा हुकम जारी कीता ऐ। इस बारे पेश ऐ स्हाड़े जिला संवाददाता दी एह रिपोर्ट.....(बाईट)

तोंआई जम्मू-कश्मीर राश्ट्री जरनैली सिड़कें पर किश थाहरें बर्फ किट्ठी होने कारण गड़डियें दी आओ-जाई जखैनी-उधमपुर कोला अग्गे बंद ऐ।

